

PRAVILNIK
O NAČINU OSTVARIVANJA PRAVA PO OSNOVU PREOSTALE RADNE
SPOSOBNOSTI
("Službene novine Kantona Sarajevo" broj 11/03)

Član 1.

Pravilnikom o načinu ostvarivanja prava po osnovu preostale radne sposobnosti (u daljem tekstu: pravilnik) utvrđuju se uslovi i postupak ostvarivanja prava po osnovu preostale radne sposobnosti u skladu sa članom 20. Zakona o dopunskim pravima boraca - branitelja Bosne i Hercegovine - u daljem tekstu: zakon ("Službene novine Kantona Sarajevo", broj: 2/2002).

Član 2.

Ratni vojni invalidi imaju pravo na profesionalnu rehabilitaciju ako prema općem obrazovanju, godinama života, zdravstvenom stanju i drugim okolnostima imaju uslove za uspješnu rehabilitaciju i ako nisu u radnom odnosu.

Član 3.

Pod pojmom profesionalne rehabilitacije podrazumjeva se osposobljavanje za vršenje ranijeg ili drugog odgovarajućeg zanimanja, stručno osposobljavanje za vršenje određenog zanimanja i stručno usavršavanje.

Član 4.

Ratni vojni invalidi koji nemaju stručnu spremu, osposobljavaju se za vršenje zanimanja za koje je potrebna stručna sprema stečena priučavanjem.

Ratni vojni invalidi koji imaju stručnu spremu nižu od spreme kvalifikovanog radnika odnosno od srednje stručne spreme osposobljavaju se za vršenje zanimanja za koje je potrebna stručna sprema kvalifikovanog radnika odnosno srednja stručna sprema.

Ratni vojni invalidi koji imaju stručnu spremu kvalifikovanog radnika, odnosno srednju stručnu spremu ili stručnu spremu višu od navedenih mogu se osposobljavati za sticanje stručne spreme jednake onoj koju imaju, ako iz opravdanih razloga ne mogu da vrše zanimanje za koje imaju stručnu spremu.

Član 5.

Ratni vojni invalidi imaju pravo na školovanje za obavljanje poslova za koje se traži viša stručna sprema od one koju ratni vojni invalid ima, ako prema općem obrazovanju,

godinama života, zdravstvenom stanju i drugim okolnostima ima uslove za školovanje.

Član 6.

Općinski organ uprave nadležan za boračko-invalidsku zaštitu može ratnog vojnog invalida koji ima stručnu spremu iz stava 3. člana 4. uputiti i na stručno usavršavanje radi sticanja stručne spreme više od one koju ima, ako se naročito istakao u ranijem radu ili stručnom osposobljavanju i ako se može opravdano očekivati da će u redovnom radu steći takvu spremu.

Član 7.

Ratni vojni invalidi koji su već rehabilitovani nemaju pravo da se putem nove profesionalne rehabilitacije osposobljavaju za vršenje zanimanja za koje je potrebna stručna sprema istog stepena za koju su se osposobili prethodnom rehabilitacijom.

Član 8.

Ratni vojni invalidi zahtjev za profesionalnu rehabilitaciju, školovanje i doškolovanje podnose nadležnoj općinskoj službi za boračko-invalidsku zaštitu gdje je ratni vojni invalid ostvario pravo na ličnu invalidninu.

Član 9.

Po prijemu zahtjeva iz člana 8. ovog pravilnika općinska služba za boračko-invalidsku zaštitu je dužna odmah uputiti zahtjev nadležnoj Ijekarskoj komisiji za ocjenjivanje radne sposobnosti da izvrši ocjenu radne sposobnosti podnosioca zahtjeva. Ocjenu radne sposobnosti nadležna komisija vrši u skladu sa propisima iz oblasti penzijsko-invalidskog osiguranja.

Član 10.

Ocjenu radne sposobnosti nadležna komisija je dužna izvršiti u roku od 30 dana od dana prijema zahtjeva i o tome u roku od 8 dana pismeno izvijestiti ratnog vojnog invalida i općinsku službu za boračko-invalidsku zaštitu od koje je upućen ratni vojni invalid.

Član 11.

Općinska služba za boračko-invalidsku zaštitu dužna je uputiti prijedlog ratnih vojnih invalida, a koji ispunjavaju uvjete po ovom pravilniku za profesionalnu rehabilitaciju Ministarstvu za boračka pitanja Kantona Sarajevo.

Član 12.

Profesionalna rehabilitacija provodi se na način i pod uslovima koji su predviđeni za rehabilitaciju po propisima o penzijskom i invalidskom osiguranju ako ovim pravilnikom nije drukčije propisano, s tim što se rehabilitacija može vršiti i redovnim školovanjem u školama srednjeg obrazovanja, višim školama i fakultetima, ali najdalje do sticanja više, odnosno visoke stručne spreme.

Na zahtjev Ministarstva za boračka pitanja Kantona Sarajevo, kantonalni organi uprave i kantonalne upravne ustanove, Grad Sarajevo, općine sa područja Kantona Sarajevo, kao i sva pravna lica čiji je osnivač Kanton Sarajevo, Grad Sarajevo, ili općina, odnosno koja se finansiraju iz budžeta sa učešćem od najmanje 25%, su dužna primiti na profesionalnu rehabilitaciju ratnog vojnog invalida kojeg uputi Ministarstvo

Član 13.

Ratni vojni invalid ima pravo da nastavi započetu profesionalnu rehabilitaciju, ako je do spriječenosti došlo usljed bolesti ili drugih opravdanih razloga, ukoliko spriječenost nije trajala duže od 6 (šest) mjeseci.

U slučaju iz prethodnog stava, trajanje profesionalne rehabilitacije može se produžiti najviše za onoliko vremena koliko je trajala spriječenost.

Ratni vojni invalid koji usljed bolesti ili drugih opravdanih razloga nije završio profesionalnu rehabilitaciju na koju je upućen može biti ponovo upućen na istu profesionalnu rehabilitaciju.

Član 14.

Ministarstvo za boračka pitanja će u roku od 8 dana od dana stupanja na profesionalnu rehabilitaciju ratnog vojnog invalida, pismeno izvijestiti općinske službe za boračko-invalidsku zaštitu koje su uputile prijedloge za profesionalnu rehabilitaciju.

Član 15.

Radi vođenja mjesečne, odnosno godišnje evidencije o predmetima profesionalne rehabilitacije nadležna služba Ministarstva za boračka pitanja će formirati posebnu evidenciju, a po potrebi podnositi izvještaj ministru za boračka pitanja, Vladi i Skupštini Kantona Sarajevo.

Član 16

Ovaj pravilnik primjenjuje se od dana objavljivanja u "Službenim novinama Kantona Sarajevo".